

Na osnovu člana 22. Zakona o lokalnoj samoupravi ("Službene novine Zeničko-dobojskog kantona", broj: 13/98 i 8/00) i člana 61. Statuta općine Visoko ("Službeni glasnik općine Visoko", broj: 4/99 i 6/99), a u vezi «Projekta Ugovor», Općinsko vijeće Visoko, na XXI sjednici održanoj 7.10.2006.godine, usvojilo je

ETIČKI KODEKS

za vijećnike Općinskog vijeća i Općinskog načelnika Visoko

I – UVODNI DIO

Član 1.

Sadržaj ovog Etičkog kodeksa (u daljem tekstu: Kodeks) utvrđuje okvir etičkih principa ponašanja za vijećnike Općinskog vijeća i Općinskog načelnika (u daljem tekstu: izabrane zvaničnike), prilagođen postojećem zakonodavstvu, propisima i principima javne administracije.

Član 2.

Predmet ovog Kodeksa su osnovni principi standardizovanog ponašanja, što građani očekuju od izabranih zvaničnika u vršenju njihovih dužnosti, a što će se odražavati i snažiti povjerenje građana prema institucijama, u funkciji općeg interesa.

II – PRIMJENA KODEKSA

Član 3.

Kodeks se odnosi na sve izabrane zvaničnike, kao direktno izabrane predstavnike svih građana.

III – OSNOVNI PRINCIPI PONAŠANJA

Član 4.

Izabrani zvaničnici prihvatanjem svečane izjave u svim slučajevima trebaju se pridržavati Ustava, Zakona, Statuta Općine, Kodeksa i drugih propisa, zanemarujući političku naklonost.

U vršenju povjerene funkcije, izabrani zvaničnici služiti će općem interesu, zalagati se za ljudska prava i slobode, ravnopravnost naroda i građana.

Izabrani zvaničnici će obavljati povjerenu funkciju i dužnost savjesno i odgovorno, uz naglašenu otvorenost i spremnost da odgovaraju za svoje odluke, djelovanja i ponašanja.

U obavljanju svojih funkcija, izabrani zvaničnici će uvažavati prava i ovlaštenja drugih izabranih zvaničnika, suzdržavajući se od podsticanja ili pomaganja u izvršavanju povjerenih funkcija radi dovođenja u privilegovan položaj sebe ili drugih izabranih zvaničnika.

IV – POSEBNE OBAVEZE

Član 5.

Izborna kampanja

Izabrani zvaničnik u toku kampanje težiti će da glasove birača pridobije poštenim i argumentovanim istupom, bez nekorektnog odnosa prema ostalim kandidatima u kampanji.

Član 6

Zabrana favorizovanja

Izabrani zvaničnici neće zloupotrebjavati svoja ovlaštenja u svrhu vlastitog interesa i interesa drugih pojedinaca i grupa.

Član 7.

Sukob interesa

Pored zakonske obaveze kada je izabrani zvaničnik obavezan da se uzdrži od vijećanja i glasanja u određenoj pravnoj stvari, kod izabranog zvaničnika postoji i moralna obaveza da se zbog ličnog interesa uzdrži od naprijed navedenih radnji i da na to ukaže prije otvaranja rasprave po tom pitanju.

Izabrani zvaničnik će se u svakom slučaju pridržavati odredaba Zakona o sukobu interesa i drugih zakona koji uređuju nespojivost funkcija izabranog zvaničnika sa funkcijom ili položajem u lokalnoj upravi, državnom organu ili preduzećima. U svim slučajevima nastupanja sukoba interesa ili nespojivosti funkcija, izabrani zvaničnik će u najkraćem roku prijaviti takav slučaj i odstupiti sa pozicije.

Izabrani zvaničnik će u svakom slučaju tokom rasprave prijaviti slučaj sukoba interesa, ako se razmatra određeni akt koji treba da bude usvojen i po kome bi on, ili njegovi srodnici i prijatelji ili pravni subjekt u kome ima finansijski ili drugi interes, trebalo da ostvari kakvu korist ili privilegiju i prilikom odlučivanja će se izuzeti od izjašnjavanja.

Izabrani zvaničnik će se uredno pridržavati zahtjeva za prijavu podataka ili davanje informacija o funkcijama koje zauzima, zanimanju i promjenama u njegovoj imovini.

Član 8.

Lične nadležnosti

Pri obavljanju diskrecionih ovlaštenja, izabrani zvaničnik neće za sebe ni za druga lica pribavljati koristi niti bilo kakve pogodnosti.

Poštujući obaveze izabrani zvaničnici su dužni prisustvovati sjednicama Općinskog vijeća i tijelima čiji su članovi, a uvažavajući jedni druge, neće napuštati sjednice prije završetka, a ni tokom trajanja, a da prije toga ne saopšte javno ili predsjedavajućem razlog povremenog ili potpunog napuštanja sjednice.

Ako su opravdanim razlogom spriječeni da prisustvuju sastancima ili sjednici na koju su uredno i blagovremeno pozvani, predsjedavajućem će saopštiti te razloge, a predsjedavajući će obavijestiti Vijeće, tijelo ili komisiju o razlogu izostanka pozvanog zvaničnika.

Izabrani zvaničnici će nastojati da prisustvuju javnim manifestacijama ili javnim skupovima na koje su uredno i blagovremeno pozvani.

Član 9.

Donošenje odluka

Odluka izabranih zvaničnika, u vršenju funkcije zasnivat će se na objektivnosti, odgovornosti, otvorenosti i usaglašenosti sa Zakonom i općim interesom, uz spremnost na odgovornost za svoje odluke.

Član 10.

Način komuniciranja

Izabrani zvaničnici u ostvarivanju komunikacije izbjegavat će obmanjivanje, manipulaciju, samopromociju i neučtivost u kreiranju i vođenju dijaloga.

U međusobnoj komunikaciji i uopšte komunikaciji sa javnošću, izabrani zvaničnik će u svakom slučaju govoriti istinu, istupati sa uvažavanjem i poštovanjem, njegovati kulturu dijaloga, razgovjetno saopštavati svoje misli i ideje, izbjegavajući korištenje izraza koji mogu vrijeđati ili omalovažavati druge ličnosti ili grupe, na taj način poštujući jednaka prava svih na uvažavanje njihove ličnosti i uvjerenja.

Član 11.

Povjerenje javnosti

Izabrani zvaničnici treba da usmjere svoje ponašanje u skladu sa javnim interesom i snaže povjerenje javnosti prema državnim institucijama.

Član 12.

Zabrana korupcije

Ovaj Kodeks isključuje prihvatanje mita i svakog drugog ponašanja, koje bi se prema važećim propisima moglo podvesti kao aktivno ili pasivno podmićivanje.

Izabrani zvaničnici ni u kom slučaju neće u obavljanju svojih funkcija primati ili davati neku naknadu, obećavati nagradu ili kakvu drugu korist ili na bilo koji drugi način se ponašati što se može okarakterisati kao aktivno ili pasivno podmićivanje po važećem zakonodavstvu, a u vezi sa podržavanjem ili ne podržavanjem određenog prijedloga akta, a naročito ako su ti stavovi suprotni Ustavu, zakonima, Statutu Općine i drugim propisima.

Član 13.

Upravljanje resursima

Od izabranih zvaničnika se očekuje da javnim resursima upravljaju na efikasan i ekonomičan način isključujući njihovo korištenje u privatne svrhe.

Izabrani zvaničnici će sa najvećom pažnjom i osjećanjem sopstvene odgovornosti usmjeravati svoje ponašanje i odluke koje se odnose na finansijska sredstva i upravljanje imovinom Općine, isključivo u skladu sa propisima i općim interesom.

Izabrani zvaničnici svojim ponašanjem neće dati povoda, niti aktivno ili pasivno učestvovati u pripremanju ili podsticati donošenje nepravilnih odluka koje bi mogle donijeti lične koristi ili ostvarenje nečijeg privatnog interesa sa kojima su povezani finansijskim ili nekim drugim interesom ili koje bi mogle biti štetne za interese zajednice.

Izabrani zvaničnici će se uzdržavati od svih akcija koje bi trebalo da rezultiraju izborom, imenovanjem ili postavljenjem lica na određene pozicije, a da se pri tome ne sprovode propisi, ne obezbijedi postupak otvorene javne konkurencije, nezavisne provjere i poštovanje principa kvaliteta, znanja i sposobnosti.

U cilju što uspješnijeg obavljanja sopstvenih dužnosti izabrani zvaničnici će, kako samostalnim aktivnostima, tako i prisustvujući seminarima, savjetovanjima i drugim oblicima edukacija, obogaćivati i usavršavati svoja znanja i sposobnosti.

V – ODNOS PREMA OPĆINSKOJ UPRAVI - ODNOS IZABRANIH ZVANIČNIKA I UPOSLENIKA LOKALNE UPRAVE

Član 14.

Izabrani zvaničnici će poštovati ulogu uposlenika lokalne uprave i promovisati iste.
Izabrani zvaničnici će podsticati i razvijati motivacione faktore da svi zaposleni rade brzo i efikasno, stručno i odgovorno, zakonito, pouzdano i kreativno.

VI – ODNOS IZABRANIH ZVANIČNIKA PREMA GRAĐANIMA

Član 15.

U obavljanju svoje dužnosti izabrani zvaničnici će zagovarati i javno zastupati interese, potrebe i inicijative svih građana, bez obzira na nacionalnu, polnu ili političku pripadnost.

Izabrani zvaničnici će posebno poticati i provoditi sve dostupne oblike, mehanizme i načine neposredne komunikacije sa građanima kroz aktivnosti i saradnju sa mjesnim zajednicama, savjetima mjesnih zajednica, zborovima građana i inicijativama građana.

Izabrani zvaničnici će unapređivati odnose saradnje sa nevladinim organizacijama i udruženjima građana.

VII – ODNOS SA MEDIJIMA

Član 16.

U sve aktivnosti koje će se voditi u primjeni Kodeksa će biti uključeni mediji.
Zvaničnici su obavezni pružiti medijima informacije iz okvira njihovog mandata.

VIII – OBLAST NADZORA

Član 17.

Izabrani zvaničnici neće sprečavati bilo koju mjeru nadzora koju budu vršili nadležni organi, uz uvažavanje izrečene privremene ili konačne odluke.

Član 18.

Izabrani zvaničnici bit će odgovorni lokalnom stanovništvu u mandatnom periodu na koji su izabrani u skladu sa odredbama ovog Kodeksa.

IX – PRAĆENJE KODEKSA

Član 19.

Praćenje Kodeksa vršit će Etička komisija (u daljem tekstu: Komisija) koju imenuje Općinsko vijeće.

Komisija ima predsjednika, zamjenika predsjednika i tri člana, a sačinjavaju je jedan vijećnik, predstavnici nevladinih organizacija i sredstava javnog informisanja, te ugledni građani.

Komisija donosi Poslovnik o svom radu na koji saglasnost daje Općinsko vijeće.

X – ŽALBENA PROCEDURA

Član 20.

Građani imaju pravo i mogućnost podnijeti predstavke i žalbe za sve oblike kršenja pravila ovog Kodeksa.

Predstavke i žalbe podnose se Komisiji u pisanom obliku.

Svaki zvaničnik, građanin ili organizacija može podnijeti argumentovanu prijavu protiv izabranog zvaničnika, ako smatra da je prekršen Kodeks.

Prijava za povredu Kodeksa treba da sadrži ime podnosioca prijave i adresu i dostavlja se isključivo u zatvorenoj koverti.

Komisija neće razmatrati anonimne prijave.

Identitet podnosioca prijave ostaje poznat članovima Komisije i zvaničnika na kojeg se prijava odnosi, do okončanja postupka provjere. O otkrivanju identiteta podnosioca prijave, nakon provedenog postupka provjere, odlučuje Komisija uz saglasnost podnosioca prijave.

Podnosilac prijave je dužan uz prijavu priložiti pisane ili druge dokaze (audio/video zapise i sl.) kojima dokazuje osnovanost prijave.

Ako Komisija zaključi da prijava nije kompletna ili dovoljno jasna može zatražiti od podnosioca prijave dodatne informacije prije poduzimanja daljih mjera provjere.

Ako Komisija primi prijavu koja se odnosi na kršenje Zakona dužna je da obavijesti podnosioca prijave da su za tu povredu nadležni sudski organi.

Ukoliko Komisija utvrdi da su navodi podnosioca prijave neosnovani, podnosilac prijave će snositi odgovornost i troškove postupka pred nadležnim organima.

XI – PROVJERA

Član 21.

Komisija će pokrenuti postupak provjere u roku od 15 dana od dana podnošenja prijave.

Osoba na koju se prijava odnosi će biti odmah obaviještena o prijavi, sa rokom od 7 dana da odgovori u pisanoj formi i da obezbijedi informacije koje smatra relevantnim za svoju odbranu pred Komisijom.

Komisija može pozvati osobu na koju se prijava odnosi da podnese dodatne informacije koje se odnose na prijavu.

Komisija može pozvati podnosioca prijave da podnese dodatne informacije o prijavi.

Komisija može pozvati na razgovor i svjedoke predložene od strane podnosioca prijave ili osobe na koju se prijava odnosi.

U roku od 30 dana od dana prijema prijave postupak provjere će biti okončan.

O svim aktivnostima Komisije vodiće se zapisnik, o čemu se stara Služba za poslove Općinskog vijeća i Općinskog načelnika.

Član 22.

O činjenicama i rezultatima provjere Komisija će sačiniti izvještaj, koji će dostaviti svim vijećnicima u Općinskom vijeću i osobi na koju se prijava odnosi.

Ako Komisija utvrdi da je prekršen Kodeks izvještaj će sadržavati i prijedlog sankcije.

Općinsko vijeće glasa o usvajanju predloženog izvještaja Komisije, zajedno sa predloženom sankcijom.

Općinsko vijeće može odlučiti da se o usvajanju izvještaja Komisije i izricanju sankcije glasa tajno.

Odluku o izricanju sankcije donosi Općinsko vijeće natpolovičnom većinom glasova.

XII - SANKCIJE

Član 23.

Za povrede odredbi ovog Kodeksa, Komisija može izreći slijedeće sankcije:

- javni ukor prvog stepena,
- javni ukor drugog stepena,
- javni ukor trećeg stepena.

Član 24.

Uz javni ukor prvog stepena izabranom zvaničniku se odbija 10 % od ukupne mjesečne naknade (vijećnička naknada i paušal i naknada za rad u komisijama, odnosno plaća) u trajanju od tri mjeseca od dana donošenja odluke Vijeća,

Uz javni ukor drugog stepena izabranom zvaničniku se odbija 15 % od ukupne mjesečne naknade (vijećnička naknada i paušal i naknada za rad u komisijama, odnosno plaća) u trajanju od pet mjeseci od dana donošenja odluke Vijeća,

Uz javni ukor trećeg stepena izabranom zvaničniku se odbija 20 % od ukupne mjesečne naknade (vijećnička naknada i paušal i naknada za rad u komisijama, odnosno plaća) u trajanju od sedam mjeseci od dana donošenja odluke Vijeća,

Član 25.

O izrečenim sankcijama za povredu ovog Kodeksa vodi se evidencija u Službi za poslove Općinskog vijeća i Općinskog načelnika.

Član 26.

Novac prikupljen na osnovu izrečenih sankcija biće usmjeren na račun Centra za socijalni rad općine Visoko.

XIII – PODRŠKA KODEKSU

Član 27.

Izabrani zvaničnici će se upoznati sa sadržajem ovog Kodeksa i njegovim principima, sa izjavom da ih prihvataju i podržavaju.

Obaveza izabranih zvaničnika je da svojom aktivnošću osiguraju promociju ovog Kodeksa, kako u javnosti tako i u medijima.

Član 28.

Kodeks stupa na snagu osmog dana od dana objavljivanja u Službenom glasniku općine Visoko.

Broj: 01/1-02-219/06
7.10. 2006. godine
V i s o k o

PREDSJEDAVAJUĆI
Općinskog vijeća Visoko
Dragan Božičković

